

四庫全書

子部

欽定四庫全書

廣博物志卷十三

明 董斯張 撰

靈異二 女僊

西王母者九靈太妙龜山金母也一號太虛九光龜臺
金母元君乃西華之至妙洞陽之極尊在昔道氣凝寂
湛體無為將欲啟迪玄功化生萬物先以東華至真之
氣化而生木公木公生於碧海之上芬靈之墟以主陽

和之氣理於東方亦號曰東王公焉又以西華至妙之
氣化而生金母金母生於神州伊川厥姓侯氏與東王
公共理二氣而育養天地陶鈞萬物焉所居宮闕有曾
城千里玉樓十二瓊華之闕光碧之堂九層玄室紫翠
丹房左帶瑤池右環翠水其山之下弱水九重非飈車
羽輪不可到也所謂玉闕暨天綠臺承霄青琳之宇朱
紫之房連琳綵帳明月四朗戴華勝佩虎章左侍僊女
右侍羽童軒砌之下植以白環之樹丹剛之林空青萬

條瑤幹千尋無風而神籟自韻琅琅然皆九奏八會之音也爾雅云王母蓬髮戴華勝虎齒善嘯者此乃王母之使金方白虎之神非王母之真形也

廣記

西王母梯几而戴勝

山海經○注梯謂憑也

東王父姓無為字君解西王母姓自然字君思一云東

王公名倪字君明西王母姓楊名回

老君枕中經

西王母姓楊一曰緱氏一曰侯氏一曰焉氏名回一曰

婉妗

廣記

萬民皆付西王母唯王聖人真人仙人道人之命上屬

九天君耳

御覽

西王母感上之誠暮必神降上乃盛施幃帳燒炷沫香

香聞數百里

漢武故事

雲華夫人者金母之女也

真仙奇記云名瑤姬

受書為雲華上宮

夫人主領教童真之士理在玉暎之臺

真僊通鑑

帝閒居承華殿東方朔董仲舒在側忽見一女子著青衣美麗非常帝愕然久之女對曰我壩宮玉女王子登

也為王母所使至七月七日王母暫來也帝下席跪諾
言訖玉女忽然不知所在帝問東方朔此何人朔曰是
西王母紫蘭宮玉女常傳使往來扶桑出入靈州交關
常陽傳言玄都阿母昔出配北燭僊人近又名還使領
命祿真靈官也

漢武
內傳

上元夫人即命侍女紀離容徑到扶廣山勅青真小童
出六甲左右靈飛致神之方十二事當以授劉徹也

真青
小童

君太上中黃道君之師真元始十天王十室弟子也姓
延陵名陽字庇華形有嬰孩之貌故仙官以青真小童

為號

王母謂帝曰夫欲修身當榮其氣太上真經所謂行益
易之道益者益精易者易形能益能易名山僊籍不益
不易不離死厄子但愛精握固閉氣吞液行之不倦神
精充溢此元始天王在丹房之中所說微言今勅侍笈
玉女李慶孫書錄之以相付子善修焉

並上。王母又有侍女郭密香

。又有侍女張靈子見茅盈傳

玉女常以黃玉為誌大如黍米在鼻上是真玉女也無

此誌者鬼試人耳

抱朴子

老君曰或見玉女青衣者名曰惠精玉女或見玉女黑衣者名曰太玄玉女或見玉女赤衣者名曰赤圭玉女或見玉女黃衣者名曰常陽玉女或見玉女三人青衣紫下裳俱來者一名常在一名絕洞一名五德或見九玉女衣服五綵俱來者一名上一名虎一名扶一名靈闕一名孔林一名憑一名住一名多一名

闕雲笈真籤

東方之神女名曰青腰玉女南方之神女名曰赤圭玉

女中央之神女名曰黃素玉女西方之神女名曰玉素
玉女北方之神女名曰玄光玉女左為常陽右為承翼
此皆玉女之名也

上

南極夫人西王母第四女也名林字容真一號紫元夫
人或曰南極元君理太丹宮受書為金闕聖君漢平帝
時降於陽落山石室之中授清虛王母太上保文等經
三十卷夫人著錦袍青羽裙左佩虎書右帶揮靈可年
十六七形貌真正天姿奄靄乘羽寶車駕以九龍女騎

九千居渤海丹海長離山中主教當為真人者

真仙通鑑

右英夫人西王母第十三女名媚蘭字申林治滄浪山受書為雲林夫人晉哀帝興寧三年七月降句曲山

紫微夫人名青娥字愈音王母第二十女也昔降寶神經與清靈裴真人行之得道晉哀帝興寧三年乙丑六月與九華安妃二十三真人十五女僊降句曲授道於真人楊羲

太真夫人王母之小女也衣服奇麗姿容絕世年可十

六七時以兒為三天太上府都官司直被降主東嶽夫人暫來往於岱宗山石室高崖重巖深隱人跡所不能到去地千餘丈中有玉儿金牀珍物奇偉每彈一弦之琴即百鳥飛集鼓舞聽之時乘白龍周旋四海僊人馬明生嘗為縣吏為賊所傷瘡甚殆死遇夫人救之數年後夫人令明生歸師安期生授金液還丹修煉昇天並上昔禪黎世界隊王有女字絳音一曰生乃不言年至十四王怪之乃棄女於南浮長桑之阿空山之中女乏糧

食常仰日咽氣引月服精自然充飽體不疲損常行山
周帀巘洞忽與神人會於丹陵之舍栢林之下執絳音
右手題赤石之上語絳音曰汝雖不能言可憶此也絳
音私心自悼受生不幸口不能言棄枉窮山誓心自願
得還人中當作功德無有愛惜百劫之後冀與願會天
為其感遣朱宮靈童下教絳音理身之術受赤書八字
之音於是能言絳音晨夕朝禮天文道真既降逆知吉
凶役使百靈坐命十方於山而出還於王國時天下大

旱人民焦燎王大懼怖祈請神明絰音往白王言常聞
山中有女不言能感於天王識之乎王於是悟識是王
女乃迎女還宮見女能言王見愧顏女顯其道為王仰
笑天降洪雨注水至丈於是化形隱景而去

洞玄本
行經

紫清上宮九華安妃名鬱嬪字靈蕭太虛元君金臺李
夫人少女詣龜山學上清道道成受太上書署為紫清

上宮九華真妃賜姓安

真仙
通鑑

王觀香字衆愛周靈王第三女也是宋姬所生於子喬

為別生妹授子喬飛解脫網之道得去入緱氏山中後
俱與子喬入陸渾移三十九年道成白日昇天子喬弟
兄七人得道

五男
二女

其眉壽是觀香之同生兄亦得道上

毛女字玉姜

神僊
傳

有魚道超魚道遠者皆秦時之女真入武夷山隱焉後
人常常見之其地四圍皆生毛竹故人因毛竹而亦呼
此二魚為毛

真仙
通鑑

南嶽夫人能隸書小有王君並傳事甚詳悉又述黃庭

內景叙青精健飯方

魏夫人傳夫人名華存

清虛真人王君侍女華教條李明龔

上

梅姑秦時丹陽縣人有道術能着履行水上縣有梅姑

廟尚存

異苑

張麗英面有奇光不照鏡但對白紈扇長沙王吳芮聞而聘之女聞芮來登金精山仰臥被髮覆石鼓下咸謂已死忽紫雲轡起遂失所在惟留歌一首歌曰石鼓石鼓哀哉下土自我來觀民生實苦世事悠悠我意慙慙

我意不可辱兮王威不可奪有鸞有鳳自舞自歌凌雲歷漢
遠絕塵羅世人之子其如我何

李真多李八百之妹也隨兄修道一日八百見真多手
持蓮花身似有孕八百怒意欲引劍揮之真多覺之倏
爾凌虛渡江產下童子經一卷遂乘雲氣冉冉昇天

真仙

通鑑

周爰支漢河南尹周暢之女也暢汝南安城人好行陰
德功在不覺曾作河南尹遭大旱收葬洛陽城傍客死

骸骨萬餘人為立義塚祭祀之應時大雨豐收太上虔以暢有陰行令爰支從南宮受化得僊今在洞中為明晨侍郎

韓太華者韓安國之妹也漢貳師將軍李廣利之婦也得道在易遷宮利宿世有功德今亦在南宮受化

張微子者漢昭帝時將作大匠張慶之女不知何郡人也微子少好道因得尸解去微子自言師東海東華王妃淳丈其受服霧氣之道云霧是山澤水火之華精金

石之盈氣久服之則能散形入空與雲氣合體微子修之得其僊道也

傅禮和者漢桓帝外甥侍中傳建之女也北地人舉家奉佛禮和常月日灑掃佛前勤勤祝誓心願仙化常服五星精身生光華得道僊去善為空同之歌歌則禽鳥相舞而集飛集其前以聽之

劉春龍漢宗正劉奉先之女以其先世有陰德故皆得道入華陽易遷宮中

郭芍藥漢度遼將軍郭寔女也少好道篤誠真人因授其六甲而得道

趙素臺者漢幽州刺史趙熙之女也熙少有善行常濟窮困救王惠等族誅有陰德數十事熙得身詣朱陵兒子得遁形遊洞天素臺在易遷宮中已四百年不肯徙自謂天下無復樂於此處也數微服遊行盼山澤以自足

黃景華者漢司空黃瓊之女也景華少好仙道常密修

至要後師韓終授其岷山丹方服之得入易遷宮位為
協晨夫人領九宮諸僊女亦總教授之

張桃枝者漢司隸校尉朱寓季陵母也沛人寓往與陳
蕃俱誅寓母以陰德久聞在易遷始得為明晨侍郎耳
真誥注云朱寓沛人桓靈之時八俊後同黨
人之烈與李膺杜密俱下獄死非陳蕃同時

竇瓊英者竇武之妹也其七代祖名峙常以葵枯骨為
事以活死為心瓊英今得女僊在易遷宮

趙愛兒者幽州刺史劉虞別駕趙該姊也好道得尸解

後又受符見居東華方諸臺

張玉蘭者張衡之女也幼而潔素不食葷血年十七歲
夢朱光入口因而有孕父母索之終不肯言惟侍婢知
之一日謂侍婢曰我死爾當剖腹以明我心其夕遂歿
父母不違其言剖腹得一物如蓮花初開其中有白素
金書十卷乃本濟經也十餘日間有大風雨晦暝遂失其
經成都記云天師雲孫女無夫而孕父疑之欲殺焉既
產有異光乃一軸書則本濟經也父以為師乃擲其刀

其後於敦信村登僊即女郎觀也今有聖女臺拋刀池洗經池存焉

王魯連魏明帝城門校尉范陽王剛女也剛得道於元洲魯連見父昇天遂勤志修道入陸山遇太乙真人授飛昇之法行之白日昇天

張姜子西州人張濟妹也

濟後漢末西涼州人為董卓將後攻穰成被射死即張繡

從叔也其妹不顯外書不知出適

李惠姑齊人夏侯玄婦也

玄魏末人與李豐俱

為晉文王所誅不知婦亡在玄之前後李豐乃是馮翊人非齊人不知此是李誰之女施淑女山陽

人施績女也

施績吳興人孫皓時為驃騎將軍守西陵今云山陽恐女或出適取夫家郡不爾則

乖

鄭天生鄧芝母也

鄧芝字伯苗南陽新野人在蜀為劉禪車騎將軍後行見蟻抱子行

引弓射殺因感念而亡母不知鄭誰之女

此數女子昔世有仁行令問並得

在洞中洞中有易遷館舍真臺皆宮名也計今在易遷

館東廂中此館中都有八十三人又有協辰夫人者九

宮之女也太上往遣來教此等法皆以保命授書協辰

夫人主教領之也夫人漢司空黃瓊女黃景華也韓終

授其岷山丹服得僊

趙威伯者東郡人也少學邯鄲張先生先生得道之人耳晚在中嶽授玉珮金鐺經於范丘林丘林乃是漢樓船將軍衛行道婦也學道得僊遂授行挹日月之道又服九靈明鏡華遂得僊昔亦來在華陽內為保命丞

郭叔香者王修母得道在易遷宮中真誥注云王修字叔冶北海人為魏武郎中今年七歲喪母母以社日亡不知郭誰女也

北元中玄道君李慶賓之女太保王郎李靈飛之小妹

受書為東宮靈照夫人治方丈臺第十三朱館中

孫寒華者吳人孫奚之女也師杜契授玄白之要顏容少艾周旋吳越諸山十餘年乃得僊道而去一云即吳大帝孫女也於茅山修道道成冲虛而去因號其山為華姥山

李奚子者晉樂平太守李惠祖母也奚子每專一志務於救人大雪寒凍每積稻布穀於園庭恐禽鳥餓死其用心如此今得道而居華陽洞中

王進賢者晉武帝尚書令王衍女為愍懷太子妃洛陽亂

劉曜石勒掠進賢渡孟津河於河中欲妻之進賢罵曰

我皇太子婦司徒公之女而胡羌小子敢欲干我乎言

畢即投河中其侍婢名六出復言曰大既有之小亦宜

然復投河中時遇嵩高女真諱西華出遊而愍之撫接

二人遂獲救外示死形體實密濟便將入嵩高山今在

華陽宮洞內

並上

六出時年二十三許體貌亦整善有心節本姓田渙

陽人魏故浚儀令田諷之孫諷會有陰德之行以及於
六出耳

嬰母者姓譙氏西晉之時丹陽郡黃堂觀居焉潛修至
道時人自童幼迨衰老見之顏狀無改衆號為嬰母因
入吳市逢有三歲孩子悲啼呼叫執母衣裾曰我母何
來母哀而收育之逾於所生既長明穎孝敬異於常人
冠歲以來風神挺邁所居常有異雲氣光景彷彿時說
蓬萊閬苑之事母異之謂曰吾與汝暫此相因汝以何

為號子曰昔蒙天真盟授靈章錫以名品約為孝道明
王今宜呼而稱之遂告母修真之訣曰每須高處玄臺
踈絕異黨修閒丘阜餌順陽和靜夷玄圃委鑒前非無
英公子黃老玉書大洞真經豁落七元太上隱玄之道
可致晏息以流霞之障睠盼乎文昌之臺得此道者九
鳳齊唱天籟駭虛竦身御節入景浮空龍車虎旂遊徧
八方矣母宜保之一旦孝道明王漠然隱去母密修道
法積數十年其後吳猛許遜自高陽南遊詣母請傳所

得之道又數年有雲龍之駕千乘萬騎來迎謔母白日

昇天

壙城
仙錄

濟北弦超嘉平中夜夢神女從之自稱天上玉女東郡
人姓成公字智瓊蚤失母天帝哀其孤苦令得下嫁從
夫當其夢也嘉善非常覺悟欽想如此三四夕旦顯然
來遊駕輜輶車從八婢服綾羅綺繡狀若飛僊自言十
七遂為夫婦贈詩曰飄飄浮勃述教曹雲石滋神僊豈
虛降應運來相之

杜蘭香自稱南陽人以建興四年春詣張傳傳年十七
望見其車在門外婢通言阿母所生遣授配君傳先改
名碩碩呼女前視可十八九說事邈然久遠有婢子二
人大者萱支小者松支鈿車青牛上飲食皆備作詩曰
阿母處靈嶽時遊雲霄際衆女侍羽儀不出墉宮外
輪送我來豈復恥塵穢從我與福俱嫌我與禍會至其
年八月旦來復作詩曰逍遙雲霧間呼吸發九嶷流汝
不稽路弱水何不之出薯豫子三枚大如雞子云食此

令君不畏風波避寒溫碩食二欲留一不肯令碩盡食
言本為君作妻情無曠遠以年命未合其小乖太歲東
方卯當還求君

杜蘭香
別傳

會稽剡縣民袁根杜碩二人獵經深山見一群山羊逐
經一石橋橋甚狹而峻向絕崖崖正赤壁立名曰赤城
經有山穴如門豁然而過既入內甚平敞草木皆香有
一小屋二女子住其中年皆十五六容色甚美着青衣
一名瑩珠一名闕

闕見二人至忻然云早望汝來遂為室

家忽二女出行云復有得壻者往慶之曳履於絕巖上

行琅琅然二人思歸潛去歸路二女追還已知乃謂曰

自可去乃以一腕囊與根語曰慎勿開也於是乃歸後

出行家人開其囊囊如蓮花一重去一重復至五葢中

有小青鳥飛去根還知此悵然而已後根於田中耕家

依常餉之見在田中不動就視但有殼如蟬蛻也

續搜神記

晉太始中北海蓬球字伯堅入山伐木忽覺異香遂遡

風尋至北山廓然宮殿盤鬱樓臺博敞球入門窺之見

五株玉樹復稍前有四婦人端妙絕世共彈棋於堂上見球俱驚起謂球曰蓬君何故得來球曰尋香而至遂復還戲一小者便上樓彈琴留戲者呼之曰元暉何為獨昇樓球樹下立覺少饑乃以舌舐葉上垂露俄然有一女乘鶴而至迎憲曰玉華汝等何故有此俗人王母已令王方平行諸僊室球懼而出門回顧忽然不見至家建平中其舊居間舍皆為墟矣

廣記

許氏者許真君遜之女也適建安黃仁覽盡得真君道

妙日究神僊之學任青州從事單騎之官留許氏侍翁
姑一夕家僮告許氏院中夜有語笑聲姑訊之許氏曰黃
郎爾姑曰吾子從事數千里安得至此許氏曰彼已得
仙道能頃刻千里戒在漏語故不敢令姑知若然當使
我見之是夕仁覽歸許氏告以故仁覽不得已出謁父
母曰仁覽雖從宦遠鄉夜必潛歸膝下僊道秘密不可
泄言恐招譴累言訖取竹杖化為青龍乘之而去後許
真君輕舉之日許氏同仁覽公姑三十二口白日飛昇

僊仗既行許氏釵偶墜落今有許氏墜釵洲

真僊通鑑

鮑靚及妹並是其七世祖李湛張慮本杜陵北鄉人也
在渭橋為客舍積行陰德好道希生故令福建於靚等
使易世變練改氏更生合為兄弟耳根胃雖異德蔭者
同故當同心氏族也今並作地下主者在洞宮中靚所
受學本自薄淺質又撓滯故不得多也

陶隱居真誥

郝綜婦丁淑英者有救窮之陰德又遇趙阜之厄而不
言內慈自中玄感皇人故令福建於曰使好僊也綜墓

在東平淑英今為朱陵嬪數遊三上司命亦令聽政焉

此二人當是回之曾祖也外書不顯

郗瞿與薛春華至垂心於門宗初不

以生人為事然訟者多但不能威制之耳每見諫考訴

者甚懃至也時節宜祠之耶此二人郗家之福鬼

外書亦無

此二人不知是何親郗雄與閻屈女不相當負石之役於今未了

喜擊犯門宗心常殺絕此二人是郗家之禍鬼

女真薛練師不知何許人也晉時世樊京邑不寧有道之士多棲寓山林以避世因居南嶽尋真臺外示同塵

內修至道嘗騎白豹遊耆闍峰黃鳥白猿不離左右

並上

錢妙真二姊妹依陶隱居誦黃庭經三十年至普通二年道成入洞即茅山燕洞也至今有紫萐蒲碧桃在焉其姊披白練衣先入洞妹後至洞已局矣

蘋花溪相傳洪崖先生煉丹地嘗有老姥採蘋其間莫

測所自來問之曰吾鮑姑也忽不見

湖廣志

廣陵茶姥者不知姓氏晉元帝南渡之後耆舊相傳見之百餘年顏色不改再持一器茗往市鬻之市人爭買

自旦至暮所買者極多而器中茶常如新熟而未減少
人多異之刺史以冒法繫之於獄姥乃持所賣茗器自
牖中飛去矣

真仙
通鑑

徐僊姑者隋朝僕射徐之才女也不知師奉何人已數
百歲狀貌如常二十四五歲善禁呪之術上



廣博物志卷十三

欽定四庫全書

子部

廣博物志卷十四

詳校官侍讀學士臣沈咸熙

主事臣祁韻士覆勘

總校官知縣臣楊懋珩

校對官中書臣石鴻緒

謄錄監生臣喬元賦

欽定四庫全書

廣博物志卷十四

明 董斯張 撰

靈異三

神

凡鵲山之首自招搖之山以至箕尾之山凡十山二千

九百五十里其神狀皆鳥身而龍首其祠之禮毛

言擇牲取

其毛色也周官曰陽祀用騂牲之毛

用一璋玉瘞

半珪為璋瘞埋也

糝用稌米

糝祀

神之米名先呂反今江東音所一壻稌稌稻也他觀反糝或作疏非也

一璧稻米白菅為

席

菅茅屬也音
間山海經

凡南次二經之首自柜山至於漆吳之山凡十七山七
千二百里其神狀皆龍身而鳥首其祠毛用一璧瘞糝
用秬

凡南次三經之首自天虞之山以至南禺之山凡十四
山六千五百三十里其神皆龍身而人面其祠皆一白
狗祈糝用秬

凡西經之首自錢來之山至於騏山凡十九山二千九

百五十七里華山冢也

冢者神鬼之所舍也

其祠之禮太牢

牛羊豕為

太牢 瑜山神也祠之用燭

燭或作煬

齋百日以百犧

牲純色

瘞

用百瑜

瑜亦美玉名音史

湯

或作温

其酒百樽

温酒令熱

嬰以百珪百

璧

嬰謂陳之以環祭也或曰嬰即古嬰字謂孟也徐州云穆天子傳曰黃金之嬰之屬也

其餘十

七山之屬皆毛牲用一羊祠之

牲謂牲體全具也左傳曰牲牲肥脂者也

燭

者百草之末灰白席采等純之

純緣也五色純之等差其文綵也周禮莞席紛

純

凡西次二經之首自鈴山至於萊山凡十七山四千一

百四十里其十神者皆人面而馬身其七神皆人面牛

身四足而一臂摻杖以行是為飛獸之神其祠之毛用

少牢

羊猪為少牢也

白菅為席其十輩神者其祠之毛一雄雞

鈐而不糝

鈐所用祭器名所未詳也或作思訓祈不糝祠不以米

毛采

言用雄色雞也

凡西次三經之首自崇吾之山至於翼望之山凡二十

三山六千七百四十四里其神狀皆羊身人面其祠之

禮用一吉玉瘞

玉加采色者也子曰吉玉大龜尸

糝用稷米

凡北山經之首自單狐之山至於隄山凡二十五山五

千四百九十里其神皆人面蛇身其祠之毛用一雄雞

彘瘞吉玉用一珪瘞而不糝

言祭不用米皆埋其所用牲玉

其山北人

皆生食不火之物

或作皆生食而不火

凡北次二經之首自管涔之山至於敦題之山凡十七

山五千六百九十里其神皆蛇身人面其祠毛用一雄

雞彘瘞

埋之

用一璧一珪投而不糝

禮玉於山中以禮神不埋之也

凡東山經之首自檉蛛之山以至於竹山凡十二山三

千六百里其神狀皆人身龍首祠毛用一大祈聃用魚

以血塗祭為舛也公羊傳云蓋叩其鼻以舛社音鉤餌之餌

凡西次四經自陰山以下至於崦嵫之山凡十九山三千六百八十里其祠祀禮皆用一白雞祈糈以稻米白菅為席

凡東次二經之首自空桑之山至於礪山凡十七山六千六百四十里其神狀皆獸身人面載鰭其祠毛用一雞祈嬰用一璧瘞

凡東次三經之首自尸胡之山至於無臯之山凡九山

六千九百里其神狀皆人身而羊角其祠用一牡羊米
用黍是神也見則風雨水為敗

凡北次三經之首自太行之山以至於無逢之山凡四
十六山萬二千三百五十里其神狀皆馬身而人面者
廿神其祠之皆用一藻蒹瘞之其十四神狀皆彘身而
載玉其祠之皆玉不瘞

不埋所用玉也

其十神狀皆彘身而八

足虺尾其祠之皆用一璧瘞之大凡四十四神皆用稌
糝祠之此皆不火食

凡薄山之首自甘棗之山至於鼓鐙之山凡十五山六千六百七十里歷兒冢也其祠禮毛太牢之具縣以吉玉

縣祭山之名也見爾雅

其餘十三山者毛用一羊縣嬰用桑封

瘞而不糝桑封者桑主也方其下而銳其上而中穿之

加金

言作神主而祭以金銀飾之也公羊傳曰虞主用桑主或用玉

凡蒔山之首自教岸之山至於和山凡五山四百四十

里其祠太逢熏池武羅皆一牡羊副

副謂破羊骨磔之以祭也見周禮音

悃悃之悃嬰用吉玉其二神用一雄雞瘞之糝用稌

凡釐山之首自鹿蹄之山至於玄扈之山凡九山千六百七十里其神狀皆人面獸身其祠之毛用一白雞祈而不禱

言直祈禱

以彩衣之

以彩飾雞

凡薄山之首自苟林之山至於陽虛之山凡十六山二千九百八十二里升山冢也其祠禮太牢嬰用吉玉首山魃也其祠用稌黑犧太牢之具蘖釀

以藥作醴酒也

干儻

干儻

萬儻干指也

置鼓

擊之儻

嬰用一璧尸水合天也

天神之所馮也

肥牲

祠之用一黑犬於上用一雌雞於下剋一牝羊獻血

以血

祭也。句猶剋也。周禮曰：句，哂用犬牲。

嬰用吉玉彩之。

又加以繒。彩飾之也。勸強

特牲饋食禮曰：執奠祝饗是也。

凡苦山之首自休與之山至於大駟之山，凡十有九山。

千一百八十四里。其十六神者，皆豕身而人面，其祠毛

瘞，用一羊羞。

言以羊為薦羞。

嬰用一漆玉瘞。

漆玉，玉有五彩者也。或曰：所以盛玉。

漆藉也。

苦山，少室、大室皆冢也。其祠之太牢之具，嬰以吉

玉。其神狀皆人面而三首，其餘屬皆豕身人面也。

凡岷山之首自女几山至於賈超之山，凡十六山，三千

五百里其神狀皆馬身而龍首其祠毛用一雄雞瘞糝

用糝文山勾欄風雨颺之山是皆冢也其祠之羞酒

進先

酒以
酌神

少牢具嬰毛一吉玉熊山席也

席者神之
所憑止也

其祠羞

酒太牢具嬰毛一璧千儺用兵以禳

禳祓除之祭名儺
者持盾武儺也

祈璆冕舞

所求福祥也祭用玉儺者
冕服也美玉曰璆已求反

凡濟山經之首自燁諸之山至於蔓渠之山凡九山一

千六百七十里其神皆人面而鳥身祠用毛

擇用
毛色

用一

吉玉投而不糝

凡縞羝山之首自平逢之山至於陽華之山凡十四山
七百九十里獄在其中以六月祭之

六月亦歲之中

如諸獄之

祠法則天下安寧

凡荆山之首自景山至琴鼓之山凡二十三山二千八
百九十里其神狀皆鳥身而人面其祠用一雄雞祈瘞

禱請已埋之也

用一漆圭精用稌驕山冢也其祠用羞酒少牢

祈瘞嬰毛一璧

凡首陽山之首自首山至於丙山凡九山二百六十七

里其神狀皆龍身而人面其祠之毛用一雄雞瘞糝用
五種之糝堵山冢也其祠之少牢具羞酒祠嬰毛一璧
瘞騶山帝也其祠羞酒太牢其合巫祝二人儻嬰一璧
凡荆山之首自翼望之山至於几山凡四十八山三千
七百三十二里其神狀皆彘身人首其祠毛用一雄雞
祈瘞用一珪糝用五種之精禾山帝也其祠太牢之具
羞瘞倒毛

薦羞反倒
牲埋之也

用一璧牛無常堵山玉山冢也皆

倒祠羞毛少牢嬰毛吉玉

凡洞庭山之首自篇遇之山至於滎余之山凡十五山

二千八百里其神狀皆鳥身而龍首其祠毛用一雄雞

一牝豚剗亦割用稌凡夫之山即公之山堯山陽

帝之山皆冢也其祠皆肆瘞肆陳之也陳牲祈用酒毛

用少牢嬰毛一吉玉洞庭滎余山神也其祠皆肆瘞肆

然後依前祈酒太牢祠嬰用圭璧十五五彩惠之惠猶

也方言

羸母之山神長乘司之是天之九德也九德九氣所生其神狀

如人而豹尾

玉山是西王母所居也

此山多玉石因以名云穆天子傳謂之群玉之山見其山河無

險四徹中繩先王之所謂策府寡草木無鳥獸穆王於是攻其玉石取玉石版三乘玉器服物載玉萬隻以歸

雙玉為轂半璧為隻西王母其狀如人豹尾虎齒而善嘯蓬髮戴

勝

蓬頭亂髮勝玉勝也音麗

是司天之厲及五殘

王母知災厲五刑殘殺之氣也又案

竹書穆王五十七年西王母來見賓於昭宮

長留之山其神白帝少昊居之實惟員神魄氏之宮

魄音

是神也主司反景

符惕之山神江疑居之

颿山神者童居之其音常如鐘磬

天山有神焉其狀如黃囊赤如丹火六足四翼渾敦無面目是識歌舞實唯帝江也

泓山神蓐收居之是山也西望日之所入其氣負神紅光之所司也

教岸之山神薰池居之

堵山神天愚居之岐山神涉翼處之

剛山剛水出焉北流注於渭是多神

規也音恥同反或

作其狀人面獸身一足一手其音如欽

欽亦吟字假音

槐江之山實惟帝之平圃神英招司之其狀馬身而人面虎文而鳥翼其音如榴有天神焉其狀如牛而八足二首馬尾其音如勃皇見則其邑有兵

崑崙之丘實惟帝之下都神陸吾司之

即肩吾也

其神狀虎

身而九尾人面而虎爪

青要之山實惟帝之密都魑武羅司之

武羅神名魑即神字

其狀

人面而豹文小腰而白齒

或作首

而穿耳以鑠

鑠金銀器之名未詳

也音渠

其鳴如鳴玉

平逢之山有神焉其狀如人而二首名曰驕蛭是為螫

蛭

為螫蛭之長

實惟蜂蜜之廬

言羣蜂之所舍集蜜亦蜂名

驕山神羆園處之

羆音羆

其狀如人面羊角虎爪恒遊於

睢漳之淵出入有光

豐山神耕父處之常遊清冷之淵出入有光見則其國

為敗

和山五曲九水合焉吉神泰逢司之其狀如人而虎尾
是好居於貧山之陽出入有光

光山神計蒙處之其狀人身而虎首恒遊於漳淵出入
必有飄風暴雨

夫夫之山神於兒居之其狀人身而手操兩蛇常游於
江淵

洞庭之山帝之二女居之

按九歌湘君湘夫人自是二神江湘之有夫人猶河洛之

有宓妃也此之為靈與天地並矣安得謂之堯女禮記
曰舜葬蒼梧二妃不從明二妃生不從征死不從葬義

可知矣即令從之二女靈達鑒通無方尚能以鳥工龍
裳救井廩之難豈當不能自免於風波而有雙淪之患
乎假復如此傳曰生為上公死為貴神禮五嶽比三公
四瀆比諸侯今湘川不及四瀆無秩於命祀而二女帝
者之后配神而靈無緣當是常遊於江淵澧沅之風交
復下降小水而為夫人也

瀟湘之淵是在九江之間出入必以飄風暴雨是多怪

神狀如人而載蛇左右手搽蛇

鍾山之神名曰燭陰

燭龍也是燭九陰因名云

視為晝瞑為夜吹為

冬呼為夏不飲不食不息息為風

息氣也

身長千里在無

脊之東其為物人面蛇身赤色居鍾山下

淮南子曰龍身一足

朝陽之谷神曰天吳是為水伯兩水間其為獸也八首

人面八足八尾皆青黃

大荒東經
東十尾

從極之淵深三百仞維水夷恒都焉

水夷馮夷也淮南
云馮夷得道以潛

大川即河伯也穆天子
傳所謂河伯無夷者

水夷人面乘兩龍

畫四面各乘
靈車駕二龍

一曰忠極之淵陽汙之山河出其中凌門之山河出其

中

皆河之枝源
所出之處也

雷澤中有雷神龍身而人頭鼓其腹在吳西

今城陽有
堯冢靈臺

雷澤在北也河圖曰大迹在
雷澤華胥履之而生伏羲

東海之渚中

渚島

有神人面鳥身珥兩黃蛇

以蛇貫耳

踐兩黃

蛇名曰禺繇黃帝生禺繇禺繇生禺京

即禺強也

禺京處北

海禺繇處東海是惟海神

言分治一海而為神也

南海渚中有神人面珥兩青蛇踐兩赤蛇曰不廷胡余

神名耳

有神名曰因因乎南方曰因乎夸風曰乎民

亦有二名

處南極以出入風

有神十人名曰女媧之腸

或作女媧之腹

化為神處栗廣之野

女媧古神女而帝者人面蛇身一日中七十變其腹化為此神栗廣野名媧音瓜

橫道而處

言斷

道有人名曰石夷來風曰韋

來或作本也

處西北隅以司日

月之長短

言察日月晷度之節

西海渚中有神人面鳥身珥兩青蛇踐兩赤蛇名曰奄

茲

西北海之外赤水之北有章尾山有神人面蛇身而赤

身長千里直目正乘

直目目從也正乘未聞

其瞑乃晦其視乃明

言視為晝

眠為夜也不食不寢不息風雨是謂

言能請致風雨

是燭九陰

照九陰之

也幽陰是謂燭龍

大荒之中有山名曰北極天樞有神九首人面鳥身名曰九鳳又有神銜蛇撻蛇其狀虎首人身四蹄長肘名曰強良

有神焉人首蛇身長如轅左右有首衣紫衣冠旃冠名曰延維人主得而饗食之伯天下

夏后啟之臣曰孟涂是司神於巴人請訟於孟涂之所其衣有血者乃執之

小人國有神名曰犁靄之尸

南方祝融獸身人面乘兩龍

也火神

東方勾芒鳥身人面乘兩龍

木神也方面素服墨子曰昔秦穆公有明德上帝使

勾芒賜之
壽十九年

西方蓐收左耳有蛇乘兩龍

金神也人面虎爪白毛執鉞見外傳

北方禺疆人面鳥身弭兩青蛇踐兩赤蛇

字玄冥水神也莊周曰禺

疆立於北極一曰禺京一本云
北方禺疆黑身手足乘兩龍

五帝廟蒼曰靈府赤曰文祖黃曰神升白曰顯紀黑曰

玄柜

廣雅

青帝護魂白帝侍魄赤帝養炁黑帝通血黃帝中主萬

人無越

度人經

天歲星主德慶其精下為大社之神天太白星主兵凶
其精下為雨師之神天熒惑星主司非其精下為風伯
之神天辰星主氣司災其精下為先農之神天鎮星主
得士之慶其精下為靈星之神

龍魚河圖

東方蒼帝神名靈威仰精為青龍南方赤帝神名赤熛
怒精為朱鳥中央黃帝神名含樞紐精為麒麟西方白

帝神名白招矩精為白虎北方黑帝神名叶光紀精為
玄武上

東方君姓燭諱開明字靈威仰南方君姓洞浮諱極炎
字赤熛怒中央君姓通斑諱元氏字含樞紐西方君姓
上金諱昌開字耀魄寶北方君姓黑節諱靈會字隱侯

局

道家玉
訣經

乾神字仲尼號曰伏羲坎神字大曾子艮神字照光玉
震神字小曾子巽神字大夏侯離神字文昌坤神字揚

翟王號曰女媧兌神字一世

一云字八世

五龍兄弟五人皆人面龍身長曰角龍木仙也次曰羽龍水仙也父曰宮龍土仙也父子同得仙治在五方今

五行之神也

遁甲開山圖

東嶽泰山君領羣神五千九百人主治死生百鬼之主帥也泰山君服青袍戴蒼璧七稱之冠佩通陽太平之印乘青龍

南嶽衡山君領仙官七萬七百人南嶽君服朱光之袍

戴九丹日精之冠佩夜光天真之印乘赤龍

中嶽嵩高君領仙官玉女三萬人中嶽君服黃素之袍
戴黃王太乙之冠佩神宗陽和之印乘黃龍

西嶽華山君領仙官玉女四千一百人華山君服白素
之袍戴太初九流之冠佩開天通真之印乘白龍

霍山南嶽儲君黃帝所命衡岳之副主也領靈官三萬
人上調和氣下拯黎民閱校衆仙制命水神是峻險之
府而諸靈之所順也儲君服青錦之袍戴啟明之冠佩

道君之玉策而來或駕科車或駕龍虎

潛山儲君黃帝所命為衡嶽儲貳時叅政事今職似輔佐者也潛山君服朱光繡衣戴參明之冠佩朱宮之印

乘赤龍之車

並上

東方太山君神姓圓名常龍南方衡山君神姓丹名靈峙西方華山君神姓浩名鬱狩北方恒山君神姓登名僧中央嵩山君神姓軍壽名逸羣呼之令人不病東方泰山將軍姓唐名臣南方霍山將軍姓朱名丹西嶽華

陰將軍姓鄒名尚北嶽恒山將軍姓莫名惠中嶽嵩高
山將軍姓石名玄恒存之郤百邪東海君姓馮名修青
夫人姓朱名隱娥南海君姓視名赤夫人姓翳名逸寥
西海君姓勾大名丘白夫人姓靈名素簡北海君姓禹
名帳黑夫人姓結名連翹河伯姓公名子夫人姓馮名

夷河
圖

東嶽姓玄丘名日陸南嶽姓爛名洋光西嶽姓浩嶽名

元倉北嶽姓伏名通萌中嶽姓角名晉生

雲笈
七籤

少昊治西方蚩尤佐之使主金玄冥治北方白辯佐之
使主水太皓治東方素何佐之使主木祝融治南方僕
程佐之使主火后土治中央后稷佐之使主土

越絕書

句芒號曰文始洪崖先生東方蒼帝東海君也祝融號
曰赤精成子南方赤帝南海君也蓐收號曰夏里黃公
西方白帝西海君也禺疆號曰冥玄子昌北方黑帝北
海君也天地神人等耳風伯神名叱號曰長育雨師神
名馮修號曰樹德諸神常當存念之馮夷號曰元梁使

者

雲笈
七籤

東海姓閔名內靈西海姓導名洞清北海姓喻名淵

東海姓何名歸君南海姓劉名漱君北海姓吳名禽強
君

東海神名阿明南海祝融西海臣乘北海禺疆

養生
雜書

堪坏得之以襲昆侖肩吾得之以處泰山禺疆得之立

乎北極西王母得之坐乎少廣

莊
子

山神謂之離河伯謂之馮夷江神謂之奇相物神謂之

鬼土神謂之獮羊水神謂之罔爲木神謂之畢方火神

謂之游光金神謂之清明

廣雅宅神江

江賦曰奇相得道而記云帝女也卒爲江

神蜀檮杌曰古史震蒙氏之女竊黃帝玄珠汎江而死化爲此神即今江濱廟是也山海經大禹生於石紐江

瀆神生於汶川

丁卯神司馬卿丁丑神趙子壬丁亥神張文通丁酉神

臧文公丁未神石叔通丁巳神崔石卿

老君六甲符圖

丁卯神名孔林埃丁丑神名梁丘叔丁亥神名林盛陸

丁酉神名費顏明丁未神名王屈奇丁巳神名許咸池

鬼谷注
陰符經

甲子神名弓隆欲入水內呼之不溺甲戌神名執明呼

之入火不燒

酉陽
雜俎

甲子神王文卿甲戌神展子江甲申神扈文長甲午神

衛上卿甲辰神孟非卿甲寅神明文章

東王公諱傀字君明佩雜色綬綬長六尺六寸

太乙君名猶

天翁姓張名刺渴

酉陽
雜俎

九源丈人者為方丈宮主領天下水神

真中有神長生大君無英公子白元尊神太乙司命桃

康合延執符把籙保命生根

度人經

其神則有無頭子倒景君翕鹿公中黃先生與鹿門大
夫張陽字子淵使備玉闕自不帶老君竹使符左右契
者不得入也

抱朴子

梁簡文云船神名馮耳五行書云下船三呼其名除百
忌又呼為孟公孟母

炎帝於火而死為竈禹勞天下而死為社后稷作稼穡

而死為稷羿除天下之害而死為宗布

淮南子又風俗通云共工之

子曰修車好遠遊舟車所至足跡所達靡不窮覽故祀以為社神

井神曰吹簫女子

白澤圖

夢神曰趾離呼之而寢夢清而吉有呪曰元州牂管娶

竺米題臨卧誦七遍吉

致虛閣雜俎

竈神名隗狀如美女又姓張名單字子郭夫人字卿忌有六女皆名察治常以月晦日上天白人罪狀大者奪

紀紀三百日小者奪算算一百日其屬神有天帝嬌孫
天帝大夫天帝都尉天帝長兄礪上童子突上紫宮君
太和君玉池夫人等一曰竈神名壤子也

酉陽雜俎
又云竈神蘇

吉利妻王
氏名搏頰

東卿司命監泰山之衆真總括吳越之萬神可謂道淵德
高折衝羣靈者也賈玄道李叔升言城生傳道流往竝
受東卿君之要也玄道河東人周威王之末年生叔升
涿郡人漢元帝時生道流北地人漢靈帝殿中將軍

也城生吳人後漢劉聖公時為武當郡尉受學至勤竝
得真道今在泰山支子小陽山中此所謂地真者也

陶隱

居真
誥

夏啟為東明公文王為西明公召公奭為南明公季札
為北明公主領四方鬼齊桓公為三官都禁郎主生死
簡籙晉文公為水官司命秦始皇為北帝上相劉季為
南明賓友孔子為太極上真公治九疑山顏回為明晨
侍郎後為三天司真張衡楊子雲為北方鬼帝治羅鄴

山周公為北帝師莊周為太玄博士嵇康為中央鬼帝
治抱犢山屈原為海伯統八海王弼為丘監嚴君平尚
在峨眉山鬼谷子為太玄師治青城山郭景純為都錄
司命治雲臺山周顗為鬼官司命賈誼為西明都禁郎
以治馬融事不當謫遷泰山司馬郗鑒為南門亭長臧
洪為北斗天門亭長紀瞻為北天修門郎與虞譚更直
守天門顧和為執蓋郎溫太真為監海伯杜預為長史
王嘉徐庶何晏殷浩俱侍帝宸庾亮為北太帝前中衛

大將軍孔融為後中衛大將軍陶侃為西河侯蔡謨為

長史荀彧為北明公賓友謝幼輿為左副監

西陽
雜俎

張良為門下侍中淮南王劉安為太極真人莊周為太
極闡編郎墨翟為太極仙卿東方朔為華陽洞主司馬
季主為委羽仙人曹植為遮須國王蔡邕為修文郎劉
楨徐幹王粲俱為侍中王導為尚書令陶隱居為蓬萊
都水監楊羲為東華上佐許遜為九州都仙太史高明
大使劉文饒為華陽洞童初府上帥鄭崇為大霍山長

顏回與卜商俱為地下修文郎

沈有履竈有髻戶內之煩壤雷霆處之東北方之下者

陪阿蛙螻躍之西方之下者則泆陽處之水有罔象丘

有萃山有夔埜有方皇澤有委蛇委蛇其大如轂其長

如轆紫衣而朱冠惡聞雷車之聲則捧其首而立見之

者殆乎霸

履水神髻竈神阿蛙螻狀如小兒泆陽豹頭馬尾罔象大耳長臂萃文身五采夔一足方

皇如蛇兩頭皆神名莊子

涸澤數百歲生慶忌慶忌者其狀若人其長四寸衣黃

衣冠黃冠戴黃蓋乘小馬好疾馳以其名呼之可使千里之外一日反報此涸澤之精也涸川之精者生於螭螭者一頭而兩身其形若蛇其長八尺以其名呼之可以取魚鼈此涸川水之精也

韓子

吳孫皓時臨海得毛人山海經云山精如人而有毛此蔣山精也故抱朴子曰山之精形如小兒而獨足足向後喜來犯人其名曰蛟知而呼之即當自却耳一名曰超空可兼呼之又或如鼓赤色一足其名曰渾又或如

人長九尺衣裘戴笠曰金累又或如龍有五色赤角名曰飛龍見之皆可呼其名不敢為害玄中記山精如人

一足長三四尺食山蟹夜出晝藏

異苑

廁之精名曰倚衣青衣持白杖知其名呼之者除不知其名呼之則死又築室三年不居其中有滿則長二尺見人則掩面見之有福又其精名忽長七尺見者有福又築室三年不居其中有小兒長三尺而無髮見人則掩鼻見之有福火之精名曰必方狀如鳥一足以其名

呼之則去水之精名曰罔象其狀如小兒赤目黑色大耳長爪以索縛之則可得烹之吉門之精名曰野狀如侏儒見之則拜以其名呼之宜飲食故澤之精名曰冕其狀如蛇一身兩頭五采文以其名呼之可使取金銀故廢丘墓之精名曰無狀如老役夫衣青衣而操杵好舂以其名呼之使人宜禾穀故道徑之精名曰忌狀如野人行歌以其名呼之使人不迷故車之精名曰寧野狀如輶車見之傷人目以其名呼之不能傷在道之精

名曰作器狀如丈夫善眩人以其名呼之則去故白之
精名曰意狀如豚以其名呼之則去故井故淵之精名
曰觀狀如美女好吹簫以其名呼之則去故臺屋之精
名曰兩貴狀如赤狗以其名呼之使人目明左右有山
石水生其澗水出流千歲不絕其精名曰喜狀如小兒
黑色以其名呼之使取飲食三軍所戰精名曰賓滿其
狀如人頭無身赤目見人則轉以其名呼之則去故水
石者精名慶忌狀如人乘車蓋一日馳千里以其名呼

之則可使入水取魚丘墓之精名曰狼鬼善與人鬪不
休為挑棘矢羽以鴟羽以射之狼鬼化為飄風脫履捉
之不能化也故市之精名曰問其狀如囚而無手足以
其名呼之則去故室之精名曰僕龍狀如小兒長一尺
四寸衣黑衣赤幘大冠帶劍持戟以其名呼之則去山
之精名夔狀如鼓一足如行以其名呼之可使取虎狼
豹故牧弊池之精名曰髡頓狀如牛無頭見人則逐人
以其名呼之則去夜見堂下有鬼被髮走物惡之精名

曰溝以其名呼之則無咎故溷之精名曰卑狀如美女而持鏡呼之知愧則去也

白澤圖

河精者人頭魚身師曠時所受讖也

宋書

或以三皇天文召司命司危五獄之君阡陌亭長六丁之靈皆使人見之而對問以諸事則吉凶昭然存諸掌無遠近幽深咸可先知也或召六陰玉女其法六十日而成成則長可役使或祭致八史八史者八卦之精也亦足以預識未形矣或服葛花及秋芒麻勃刀圭方寸

七忽然如欲卧而聞人語之以所不覺之事吉凶立定也或用明鏡九寸以上自照有所思存七日七夕則見神仙或男或女或老或少一示之後心中自知千里之外方來之事也明鏡或用一或用二謂之日月鏡或用四謂之四規四規者照之時前後左右各施一也用四規所見來神甚多或縱目或乘龍駕虎冠服采色不與世同皆有經圖欲修其道當先暗誦所當致見諸神姓名識其衣冠不爾則卒至而忘其神或能驚懼則害人

也為之率欲得靜漠幽閑林麓之中外形不驚目外聲不入耳其道必成也三童九女節壽君九首蛇軀百二十官雖來不得熟視也或有問之者或有訶怒之者亦弗荅也或有侍從暉暉力士甲卒乘龍駕虎簫鼓嘈嘈勿舉目與言也但諦念老君真形老君真見形則起再拜也老君真形者思之姓李名聃字伯陽身長九尺黃色深嘴隆鼻秀眉長五寸耳長七寸額有三理上下赤足有八卦以神龜為牀金樓玉堂白銀為堦五色雲為

衣重疊之冠鋒鋌之劍從黃金百二十人左有十二青龍右有二十六白虎前有二十四朱雀後有七十二玄武前道十二窮竒後從三十六辟邪雷電在上晃晃昱

昱

抱朴子 又云執八歲威之節佩老子玉策則山神可使豈敢為害乎

依七佛經云若有人能受持五戒感得二十五神侍衛殺戒有五神一名波吒羅二名摩邠斯三名婆睺邠四名呼奴吒五名頗羅吒盜戒有五神一名法善二名佛奴三名僧善四名廣額五名慈善姪戒有五神一名貞

潔二名無欲三名淨潔四名無染五名蕩滌妄戒有五
神一名美旨二名實語三名質直四名直答五名和合
語飲酒戒有五神一名清素二名不醉三名不亂四名
無失五名護戒

法苑珠林

庖羲氏使鬼物以致羣祠以犧牲登薦百神則祭祀之

始也

拾遺記

炎慶甲者古之炎帝也今為北太帝君天下鬼神之主

也

真誥

黃帝會鬼神於泰山駕象車六蛟龍

墨子

少昊以金德王母曰皇娥處璇宮而夜織或乘桴木而
晝游經歷窮桑滄茫之浦時有神童容貌絕俗稱為白
帝之子即太白之精降乎水際與皇娥讌戲奏嬖媚之
樂游漾忘歸窮桑者西海之濱有孤桑之樹直上千尋
葉紅堪紫萬歲一實食之後天而老帝子與皇娥汎於
海上以桂枝為表結薰茅為旌刻玉為鳩置於表端言
鳩知四時之候今之相風此之遺象也帝子與皇娥竝

坐撫桐峯梓瑟皇娥倚瑟而清歌曰天清地曠浩茫茫
萬象迴薄化無方滄天蕩蕩望滄滄乘桴輕漾著日旁
當期何所至窮桑心知和樂悅未央俗謂遊樂之處為
桑中也白帝子荅歌曰四維八埏渺難極驅光逐影窮
水域璇宮夜靜當軒織桐峯文梓千尋直伐梓作器成
琴瑟清歌流暢樂難極滄湄海浦來棲息及皇娥生少
昊號曰窮桑氏亦曰桑丘氏至六國時桑丘氏著陰陽
書即其餘裔也

拾遺記

禹鑿龍關之山亦謂之龍門至一空巖深數十里幽暗不可復行禹乃負火而進有獸狀如豕啣夜明之珠其光如燭又有青犬行吠於前禹計可十里迷於晝夜既覺漸明見向來豕犬變為人形皆著玄衣又見一神虵身人面禹因與語神即示禹八卦之圖列於金版之上又有八神侍側禹曰華胥生聖子是汝耶答曰華胥是九河神女以生余也乃探玉簡授禹長一尺二寸以合十二時之數使量度天地禹即執持此簡以平定水土

蛇身之神即羲皇也

上

禹治水三至桐栢山驚風迅雷石號木鳴五伯擁川天
老肅兵不能興禹怒召集百靈搜命夔龍桐栢千君長
稽首請命禹因囚鴻蒙氏商章氏兜氏盧氏犁婁氏乃
獲淮渦水神名無支祈善應對言語辨江淮之淺深原
隰之遠近形若猿猴縮鼻高額青軀白首金目雪牙頸
伸百尺力踰九象禹授之童律不能制授之烏木田不
能制授之庚辰能制鴟脾桓胡木魅水靈山妖石怪奔

號褻繞以千數庚辰持戟逐去頸鎖大索鼻金鈴徙之

淮陽之龜山足下裨淮水永安流注海也

古嶽
讀經

禹理洪水觀於河見白面長人魚身出曰吾河精也授

禹河圖而還於淵中

尸
子

僕躬耕南陽之畝遂蒙劉氏顧草廬勢不可卻計善事
之於是情好日密相拉總師趨蜀道履黃牛因覩江山
之勝亂石排空驚濤拍岸歛巨石於江中崔嵬巖岼列
作三峯平治泝水順遵其道非神扶助於禹人力奚能

致此耶僕縱步環覽乃見江左大山壁立林麓峰巒如
畫熟視大江重複石壁間有神像影現焉鬚髮鬚眉冠
裳宛然如彩畫者并豎一旌旗右駐一黃犢猶有董工
開導之勢古傳所載黃龍助禹開江治水九載而功成
信不誣也惜乎廟貌廢去使人太息神有功助禹開江
不事鑿斧順濟舟航當廟食茲土僕復而興之再建其

廟號目之曰黃牛廟以顯神功

諸葛亮黃
陵廟記

昔三苗大亂天命夏禹於玄宮有大神人面鳥身降而

福之司祿益食而民不饑司金益富而固家實司命益

年而民不夭四方歸之禹乃克三苗而神民不違

隋巢子

伯益字殯歟為唐澤虞是為百蟲將軍

今鞏洛嵩山有百蟲將軍廟是

也自漢有之水經云晉元康

五年七月順人吳義復立

夏桀時天乃命湯於醴宮有神來告曰夏德大亂往攻

之予必使汝乃戡之

墨子

有神降於莘王問內史過曰是何故也對曰昔夏之興

也祝融降於崇山其亡也回祿信於聆隧商之興也禱杌

次於丕山其亡也夷羊在牧周之興也鷩鷩鳴於岐山
其衰也杜伯射王于鄩是皆明神之志者也昔昭王娶
於房曰房后實有爽德協於丹朱丹朱馮身以儀之生
穆王焉實臨照周之子孫而禍福之

國語

湯時有神牽白狼啣鉤入朝乃東觀沈璧於洛獲黃魚

黑玉之瑞

世紀

武王伐紂都洛邑未成陰寒雨雪十餘日深丈餘甲子
平旦不知何五丈夫乘五車從兩騎止門外欲謁武王

武王將不出見大公曰不可雪深丈餘而車騎無跡恐是聖人王使太師尚父謝五大夫曰賓幸臨之失不先問方修法服太師尚父使人持一器粥出進五車兩騎曰大夫在內方對天子天寒故進熱粥以御寒未知長幼從何起兩騎曰先進東海君次河伯風伯雨師粥既畢使者具以告尚父尚父告武王曰客可見矣武王曰諸神各有名乎師尚父曰南海神名祝融北海神名玄冥東海神名句芒西海神名蓐收河伯名馮修請使謁

者各以其名召之武王乃於殿上謁者於殿下門外引祝融進五神皆驚相視而歎祝融拜武王王曰天陰乃遠來何以教之神曰王伐殷立周謹來受命願勅風伯雨師各使奉其職武王曰予歲時亦無廢禮焉

太公金匱

武王問太公曰天下神來甚衆恐有試者何以待之太公曰請樹槐於王門內有益者入無益者距之

上

天子西征驚行至於陽紆之山河伯無夷之所都居

穆天

子傳

關中有金魚神周平王時十旬不雨祭此神俄生涌泉

魚躍降雨

述異記

儒家之徒董無心墨家之徒躔子相見講道躔子稱墨家右鬼神是引秦繆公有明德上帝賜之九年董子難以堯舜不賜年桀紂不天死而秦穆晉文言之夫謬者誤亂之名文者德惠之表有誤亂之行天賜之年有德惠之操天奪其命乎

論衡

號公夢在廟有神人面白毛虎爪執鉞立於西阿公懼

而走神曰無走帝命曰使晉襲於爾門公拜稽首覺召
史嚚占之對曰如君之言則蓍收也天之刑神也天事
官成公使囚之且使國人賀夢舟之僞告其諸侯曰衆
謂虢亡不久吾今乃知之君不度而賀大國之襲於己
何瘳吾聞之曰大國道小國襲焉曰報小國傲大國襲
焉曰誅民疾君之侈也是以遂於逆命今嘉其夢侈心
展是天奪之鑑而益其疾民疾其態天又誑之大國來
誅出令而逆宗國既卑諸侯遠己內外無親其誰云救

之吾不忍族也將行以其族適晉六年號乃亡

國語

晉平公至澮上見人乘白驂八駟以來有狸身而狐尾去其車而隨公之車公問師曠師曠曰狸身而狐尾其名曰首陽之神飲酒於霍泰山而歸其逢君於澮乎君

其有喜焉

古文
瑣語

晉侯有疾鄭伯使公孫僑如晉聘且問疾叔向問焉曰寡君之疾病卜人曰實沉臺駘為祟史莫之知敢問此何神也子產曰昔高辛氏有二子伯曰閼伯季曰實沈

居於曠林不相能也日尋干戈以相征討后帝不減遷
閔伯於商丘主辰商人是因故辰為商星遷實沈於大
夏主參唐人是因以服事夏商其季世曰唐叔虞當武
王邑姜方震大叔夢帝謂己余命而子曰虞將與之唐
屬諸參而蕃育其子孫及生有文在其手曰虞遂以命
之及成王滅唐而封大叔焉故參為晉星由是觀之則
實沈參神也昔金天氏有裔子曰昧為玄冥師生允格
臺駘臺駘能業其官宣汾洮障大澤以處大原帝用嘉

之封諸汾州沈如蓐黃實守其祀今晉主汾而滅之矣

由是觀之則臺駘汾神也

左傳

鄭子產聘於晉晉侯有疾韓宣子逆客私焉曰寡君寢疾於今三月矣並走羣望有加而無瘳今夢黃熊入於寢門其何厲鬼也對曰以君之明子為大政其何厲之有昔堯殛鯀于羽山其神化為黃熊以入于羽淵實為夏郊三代祀之晉為盟主其或者未之祀也乎韓子祀夏郊晉侯有間賜子產莒之二方鼎

上

齊景公伐宋過泰山夢見二人怒公恐謂泰山之神晏子以宋祖湯與伊尹為言其狀湯姿容多髭鬚伊尹黑而短即此夢也景公進軍不聽車轂毀公恐乃散軍不

伐宋

物異志 晏子云湯質皙而長頗以髭鬚上豐下倨身而揚聲伊尹黑而短蓬而髭鬚上兌下倨身

而下聲 又璣語作盤庚伊尹云盤庚長九尺餘大下小上白而髭好仰而聲上

鄭繆公晝日處廟有神人面鳥身素服面狀方正繆公大懼神曰無懼帝厚汝明德使錫汝壽十年使若國昌公問神名曰予為勾芒也

墨子

孔子生夜有二蒼龍自天而下來附徵在之房因夢而生孔子有二神女擎香露於空中而來以沐浴徵在又有五老列於徵在之庭則五星之精也

拾遺記

孔子母徵在遊大冢之坡睡夢黑帝使請與已交語曰

女乳必於空桑之中

春秋孔演圖

項橐魯人十歲而亡時人尸而祝之號小兒神

圖經

孟子生時其母夢神人乘雲自泰山來將止於嶧母疑視久之忽片雲墜而寤時間巷皆見有五色雲覆孟子

之居焉

屈原以忠見斥隱於沅湘披蓁茹草混同禽獸采栢實以和桂膏用養心神被王逼逐乃赴清泠之水楚人思慕謂之水仙其神遊於天河精靈時降湘浦楚人為之

立祠

拾遺記

昔秦漢二代大興祈禱所祭太乙神陳寶八仙之屬動用牛羊穀帛錢費億萬了無所益況於匹夫德之不備體之不養而欲以三牲酒肴祝愿鬼神以索延年惑亦

甚矣

抱朴子

秦時丹陽縣湖側有梅姑廟生時有道術能著履行水

上後負道法夫怒殺之投屍于水乃隨波漂流至今廟

處巫人常令殯殮不須墳墓即時有方頭漆棺在祠堂

下晦望之日時見霧中曖然有著履形廟左右不得取

魚射獵輒有迷徑溺沒之患巫云姑既傷死所以惡見

殘殺

法苑珠林

秦始皇作石橋欲過海觀日所出處傳云時有神能驅

石下海陽城十一山今盡起立巍巍東傾如相隨形狀
又云石去不速神人輒鞭之皆流血石莫不悉赤至今
猶爾秦皇于海中作石橋或云海神為之豎柱始皇感
其惠乃通敬于神求與相見神云我形醜約莫圖我形
當與帝會始皇乃從石橋入三十里與神相見帝左右
有巧者潛以脚畫神怒曰帝負約可速去始皇即轉馬
前脚猶立後脚隨崩僅得登岸

三齊
要會

秦始皇與神女遊忤其旨唾之生瘡始皇怖謝乃為出

溫湯洗除

辛氏三
秦記

武帝時迷於鬼神尤信越巫董仲舒數以為言武帝欲
驗其道令巫詛仲舒仲舒朝服南面誦詠經論不能傷
害而巫者忽死

風俗
通

漢武帝在甘泉宮有玉女降常與帝圍棋帝乃逼之玉
女因唾帝面而去遂病瘡經年漢書云避暑甘泉宮此
其時也

幽明
錄

漢武帝宴於未央方噉黍臠忽聞人語云老臣冒死自

訴不見其形尋覓良久梁上見一老翁長八九寸面目
頽顙鬚髮皓白拄杖僂步篤老之極帝問曰叟姓字何
居在何處何所病苦而來訴朕翁緣柱而下放杖稽首
嘿而不言因仰頭視屋俯指帝脚忽然不見帝駭愕不
知何等乃曰東方朔必識之於是召方朔以告朔曰其
名為藻水木之精夏巢幽林冬潛深河陛下頃日頗興
造宮室斬伐其居故來訴耳仰頭看屋而復俯指陛下
脚者足也願陛下宮室足於此帝感之既而息後幸瓠

子河聞水底有絃歌聲前梁上翁及年少數人絳衣素帶纓佩甚鮮皆長八九寸有一人長尺餘凌波而出衣不需需或有挾樂器者帝方食為之徹膳命列坐於食案前帝問曰聞水底樂奏為是君耶老翁對曰老臣前昧死歸訴幸蒙陛下天地之施即息斧斤得全其居不勝歡喜故私相慶樂耳帝曰可得奏樂否曰故齋樂來安敢不奏長人便絃而歌歌曰天地德兮垂至仁愍幽魄兮停斧斤保窟宅兮庇微身願天子兮壽萬春歌聲

大小無異於人清徹遠越梁棟又二人鳴管撫節調弄
聲諧帝歡悅舉觴並勸曰不德不足當雅贐老翁等並
起拜受爵各飲數升不醉獻帝一紫螺殼中有物狀如
牛脂帝問曰朕闇無以識此物曰東方生知之耳帝曰
可更以珍異見貽老翁顧命取洞穴之寶一人受命下
沒淵底倏忽還到得一大珠徑數寸明耀絕世帝甚愛
翫翁等忽然而隱帝問朔紫螺殼中何物朔曰是蛟龍
髓以傳面令人好顏色又女子在孕產之必易會後宮

產難者試之殊有神效帝以脂塗面便悅澤又曰何以
此珠名洞穴珠朔曰河底有一穴深數百丈中有赤蚌
蚌生珠故以名焉帝既深歎此事又服朔之奇識上

蜀有迴復水江神嘗流殺人文翁為守祠之勸酒不盡

拔劍擊之遂不為害

水經注

初宣帝時陰子方者至孝有仁恩臘日晨炊而竈神形

見子方再拜受慶家有黃羊因以祀之自是暴富

後漢書

文選注引王褒碧雞頌曰持節使者王褒謹拜南崖敬

移金精神馬縹碧之雞

云

歸來歸來漢德無疆廣乎

唐虞澤配三皇黃龍見兮白虎仁歸來歸來可以為倫
歸來翔兮何事南荒

茂陵富人袁廣漢藏鏹巨萬家僮八九百人於北邙山
下築園東西四里南北五里激流水注其內構石為山
高十餘丈連延數里養白鸚鵡紫鴛鴦牝牛青兕奇禽
怪獸委積其間移沙為洲嶼激水為波潮其中置江鷗
海鶴孕雛產鵝延漫林池奇樹異草靡不具植屋皆排

徊連屬重閣修廊行之移晷不能偏也所親或以僭侈
戒之廣漢傲然不從其家常祀太一神一夕假寐忽見
神告之曰不即歛戢且禍及既覺終不能從後竟被誅

西京
雜記

習郁為侍中時從光武幸黎丘與帝通夢見蘇山神光
武嘉之拜大鴻臚錄其前後功封襄陽侯使立蘇嶺祠
刻二石鹿俠神道百姓謂之鹿門廟或呼蘇嶺山為鹿

門山

襄陽耆
舊傳

漢朱遵仕郡功曹公孫述僭號遵擁郡人不伏述攻之
乃以兵拒述埋車絆馬而戰死光武追贈輔漢將軍吳
漢表為置祠一日遵失首退至此地絆馬訖以手摸頭
始知失首於是士人感而義之乃為置祠號為健兒廟
後改勇士廟

新漢縣
圖記

第五公誅除妖道而既壽且貴宋廬江罷除山祭而福
祿永終文翁破水靈之廟而身吉民安魏武禁淫祀之

俗而洪慶來格

抱朴
子

汝南鮑陽有於田得磨者其主未往取也商車十餘乘
經澤中行望見此磨著繩因持去持一鮑魚置其處有
頃其主往不見所得磨反見鮑魚澤中非人道路怪其
如是大以為神轉相告語治病求福多有效驗因為起
祠舍衆巫數十幃帳鐘鼓方數百里皆來禱祀號鮑君
神其後數年鮑魚主來歷祠下尋問其故曰此我魚也
當有何神上堂取之遂從此壞

風俗通 李君
事同不重錄

范丹少為尉從佐使檄謁督郵丹有志節自恚為厮役

小吏及於陳留大澤中殺所乘馬捐棄官幘詐逢劫者
有神下其家曰我范史雲也為劫人所殺疾取我衣於
陳留大澤中家取得一幘丹遂之南郡轉入三輔從英
賢遊學十三年乃歸家人不復識焉陳留人高其志行
及歿號為貞節先生

搜神記

漢時泰山黃原平旦開門忽見一青犬在門外伏守備
如家養原繼犬隨隣里獵日垂夕見一鹿便放犬犬行
甚遲原絕力逐終不及行數里至一穴入百餘步忽有

平衢槐柳列植垣牆迴匝原隨犬入門列房可有數十
間皆女子姿容妍媚衣裳鮮麗或撫琴瑟或執博碁至
北閣有三間屋二人侍直若有所伺見原相視而笑云
此青犬所引至妙音婿也一人留一人入閣須臾有四
婢出稱太真夫人白黃郎有一女年已弱笄冥數應為
君婦既暮引原入內有南向堂堂前有池池中有臺臺
四角有徑尺穴穴中有光照映帷席妙音容色婉妙侍
婢亦美交禮既畢宴寢如舊經數日原欲暫還報家妙

音曰神人道異本非久居至明日解佩分袂臨階涕泣曰
後會無期深加愛敬若能相思三月旦可修齋戒四婢
送出門半日至家情念恍惚每至期常見空中有輶車
彷彿若飛

漢中有鬼神藥侯常在承塵上喜食鮓菜能知吉凶甘
露中大蝗起所經處禾稼輒盡太守遣使告藥侯祀以
鮓菜侯謂史曰蝗虫小事輒當除之言訖翕然飛出吏
髣髴其狀類鳩聲如水鳥吏還具白太守即果有衆鳥

億萬來食蝗虫須臾皆盡

列異傳

龍舒陵亭有一大樹高數十丈黃鳥十數巢其上時久旱長老共相謂曰彼樹常有黃氣或有神靈可以祈雨因以酒脯往亭中有寡婦李憲者夜起室中忽見一繡衣婦人曰我樹神也以汝性潔佐汝為生來朝父老皆欲祈雨吾有求之於帝至明日日中果大雨遂立為祠憲曰諸卿在此吾近居水當致少鯉魚言訖有鯉數十頭飛集堂下坐者莫不驚悚如此歲餘神曰將有大兵

今辭汝去留一玉環曰持此可以避難後袁術劉表相
攻龍舒之民皆流去惟憲里不被兵

搜神記

南州人有遣吏獻犀簪于孫權者舟過官亭湖廟而乞
靈焉神忽下教曰須汝犀簪吏惶遽不敢應俄而犀簪
已前列矣神復下教曰俟汝至石頭城反汝簪吏不得
已遂行自分失簪且得死罪比達石頭忽有大鯉魚長
三尺躍入舟剖之得簪

諸葛恪為丹陽太守出獵兩山之間有物如小兒伸手

欲引人恪令伸之曰去故地即死既而參佐問其故以
為神明恪曰此事在白澤圖內曰兩山之間其精如小
兒見人則伸手欲引人名曰僕囊引去故地則死諸人
未之見也

並上

司馬懿拜司空日有人叩門請見自稱白虎使者衣白
衣懷中探一物內懿手中戒曰兩世慎勿開墓中絕言
訖不見懿曰此或數也遂開視之乃一金龍子長三四
尺背上有銘云父子從我受重火至武帝受禪世墓中

絕玄帝渡江都建業

獨異志

孝武帝遊于清暑殿有人黃衣自號天泉池神名淋岑君謂帝曰若見善待當福佑之帝怪恐授以佩刀神怒曰君為不道當使知之因不見遂聞鼓輦之響而去帝乃請大沙門為齋轉誦見一臂長二丈來摸經案甚怪之後帝與宮妓汎龍舟宴飲于池有慢色神乃見形攀龍舟沈帝遂溺死

經圖

烏傷陳氏有女未醮著履徑上大楓樹顛了無危懼顧曰我應為神今便長去惟左蒼右黃當暫歸耳家人悉

出見之舉手辭訣於是飄聳輕越極睇乃沒人不了蒼黃之意每春輒以蒼狗秋黃犬設祀於樹下

異苑

汝陽有彭氏墓近大道墓口有一石人田家老母到市買數片餌以歸天熱過蔭彭氏墓口樹下以所買餌暫著石人頭上及去忘取之後來者見石人頭上有餌求而問之或人調云此石人有神能治病病愈者以餌來謝之如此轉以相語云頭痛者摩石人頭腹痛者摩石人腹亦還以自摩無不愈者遂千里來就石人治病初

具雞豚後用牛羊為立帷帳管絃不絕如此數年前忘
餌母聞之乃為人說無復往者

抱朴子

西門豹之神夢交於荀氏而生苻堅

建康小吏曹著見廬山夫人夫人命女婉與著相見婉
見著欣悅命婢瓊林取琴出婉撫琴歌云登廬山兮鬱
嵯峨睎陽風兮拂紫霞招若人兮濯靈波欣良運兮暢
雲柯彈鳴琴兮樂莫過雲龍會兮樂太和著意不安屢
求去婉垂涕為別并贈織成禪衫

搜神記

晉太元中謝家沙門竺曇遂年二十餘白晢端正嘗行經青溪廟前過因入廟中看暮歸夢一婦人來語云君當來作我廟中神不復久曇遂夢問婦人是誰婦人云我是青溪中姑如此一月許便病臨死謂同學年少曰我無福亦無大罪死乃當作青溪廟中神諸君行便可過看之既死後諸年少道人詣其廟既至便靈語相勞問音聲如昔時臨去云久不聞呬思一聞之其伴慧覲便為作呬訖其猶唱讚語云岐路之訣尚有悽愴況此

之非形神分散窈冥之歎情何可言既而歔歔不自勝

諸道人等皆為流涕

續搜神記

晉明時獻馬者夢河神請之及至與帝夢同即投河以奉神始太傅褚裒亦好此馬帝云已與河神及褚公卒

軍人見公乘此馬矣

孔約志怪

徐登趙昞貴尚清儉祀神以東流水削桑皮以為脯

搜神

記

永嘉中有神見兗州自稱樊道基有嫗號成夫人夫人

好音樂能彈箏篴聞人絃歌輒便起舞

上

廬江匡先生廟舟人往來致禱能分風送之晉曹毗詩

云分風為二擘流為兩

海錄

豫章有戴氏女久病不差見一小石形像偶人女謂曰
爾有人形豈神能差我宿疾者吾將重汝其夜夢有神
告之吾將祐汝自後疾漸差遂為立祠山下戴氏為巫

故名戴侯祠

投神記

晉揚州江畔有亭湖神嚴峻甚惡于時有一客僧婆羅

門名曰法藏善能持咒辟諸邪毒並皆有驗別有小僧就藏學咒經於數年學業成就故詣亭湖神廟止宿誦咒伏神其夜見神遂致殞命藏師聞弟子誦咒致死懷忿自來夜到神廟瞋意誦咒神來出見自亦致死同寺有僧每恒受持般若聞師徒並亡遂來神所於廟夜誦金剛般若至夜半中間有風聲極大迅速之間見有一物其形偉大眼光如電經師端坐正念誦經神來至師前右膝著地聽經訖師問神曰檀越是何神靈初來猛峻後

乃容豫神答曰弟子惡業報得如是是此湖神然甚信

敬經師又問若神信敬何意前二師並皆打死答云前

二師死者為不能受持大乘經典瞋心誦呪見弟子來

專誦惡語欲降弟子弟子不伏于時二師見弟子形惡

自然怖死亦非弟子故殺二僧左近道俗見苒二僧被

殺謂經師亦死相率往看且見平安容儀歡泰時人甚

怪競共問由具答前意實因般若威力聖教不虛

法苑珠林

釋僧稠常於鵲山靜處感神來繞抱肩築腰氣噓頂上

稠以死要心因證心定九日不起

梁高僧傳

晉始豐赤城山有支曇蘭青州人蔬食樂禪晉太元中遊剡後憩始豐赤城山見林泉清曠居之忽見一人長數丈呼蘭令去又見諸異形禽獸以駭蘭見蘭恬然自得乃屈膝云珠欺王是家舅今往韋鄉山就之推此處以相奉爾後三年忽見車騎隱隱從者彌峰俄而有人著幘稱珠欺王通既前從其妻子男女等二十三人並形貌端正有逾於世既至蘭所暄涼訖蘭問住在何處

荅云樂安縣韋鄉山久服夙聞今與家累仰投乞受歸
戒蘭即受之受法竟觀錢一萬密二器辭別而去便聞
鳴笳動天響振山谷

法苑珠林

沛國戴文謏居陽城山有神降妻焉謏疑是妖魅神已
知之便去遂見作一五色鳥白鳩數十枚從有雲覆之

遂不見

搜神記

益州之西雲南之東有神祠尅山石為室下有人奉祠
之自稱黃公因言此神張良所受黃石公之靈也清淨

不烹殺諸祈禱者持一百錢一雙筆一丸墨石室中前請乞先聞石室中有聲須臾問來人何欲既言便具語吉凶不見其形至今如此上

苻堅入寇會稽王道子以威儀鼓吹求於鍾山之神奉以相國之號及堅至壽春望八公山草木皆類人形若有力焉

晉書

臨海羅陽縣有神自稱王表語言飲食與人無異然不見其形又一婢名績紡遣中書郎李崇賁輔國將軍羅

陽縣印綬迎表表隨崇俱出所歷山川輒遣婢與其神
相聞表至權於蒼龍門外為立第舍表說水旱小事往
往有驗

吳志

宮亭湖孤石廟嘗有估客下都經其廟下見二女子云
可為買兩量絲履自相厚報估客至都市好絲履并廂
盛之自市書刀亦內廂中既還以廂及香置廟中而去
忘取書刀至河中流忽有鯉魚跳入船內破魚腹得書

刀焉

搜神記

有商人區明者過彭澤湖有車馬出自稱青洪君要明
過厚禮之問何所須有人教明但乞如願及問以此言
荅青洪君甚惜如願不得已許之乃其婢也既而送出
自稱商人或有所求如願並為即得後至正旦如願起
晚乃打如願如願走入糞中商人以杖打糞掃喚如願
竟不還也

錄異
記

陶侃家童子千餘人嘗得胡奴不喜言嘗默坐侃一日
出郊奴執鞭以隨胡僧見而驚禮云此海山使者也侃

異之至夜失奴所在

異死

王猛少貧賤鬻菴為事嘗至洛陽貨菴有人於市貴買其菴云家近在此可隨我取直隨去忽至深山此人曰且住當先啟道君須臾猛進見一公踞胡床頭白將從十許人有一人引猛云大司馬公可進猛因拜老公公曰王公何緣拜即發人送猛出山既出顧視乃嵩高山也

晉中興書

顧劭為豫章禁淫祀毀諸廟至廬山廟一郡悉諫不從

夜有人經前狀若方相云是廬山君劬要之入坐與談
春秋燈盡燒左傳以續之鬼欲凌劬神氣湛然鬼返和
遜求復廟劬笑而不荅鬼怒曰三年內君必衰當此時
相報如期劬果病咸勸復廟劬曰邪豈勝正終不聽遂

卒

商芸
小紀

蘭啟之家在南鄉有樗蒲婁廟啟之有女名僧暴死一夕
而寤云樗蒲君遣婢迎僧坐斗帳中仍陳盛筵以金銀
為俎案五色玉為杯碗與僧共食一宿而醒也

上

陳後主禎明二年有神自稱老子遊於都下與人對語而不見形吉凶多驗得酒輒飲之經三四年乃去有船下忽聞人言明年亂視之得死嬰兒長三尺而無頭明

年陳亡

南史

宋咸寧中太常卿韓伯子某會稽內史王蘊子某光祿大夫劉耽子某同遊蔣山廟有數婦人像甚端正某等各指像以妻匹配戲弄之即以其夕三人同夢蔣侯遣傳教相聞曰家子女甚醜陋而隈蒙榮顧輒尅某月某

日悉相迎某等以其夢指適異常試往相問而果各得此夢符協如一於是大懼備三牲詣廟謝罪乞哀又俱夢蔣侯親來降已曰君等既以顧之實幸今剋期坐及豈容君等中悔經少時並亡

會稽趙文韶宋元嘉中為東扶侍廨在清溪中橋清夜步月悵然思歸乃倚門唱烏飛曲忽有青衣詣門曰女郎聞歌聲有悅人者逐月遊戲故遣相問須臾女郎至年可十八九許容色絕妙謂文韶曰聞君善歌能為作

一曲否文韶為歌草生盤石下聲甚清美女郎顧青衣
取箜篌鼓之泠泠似楚曲又令侍婢歌繁霜自脫金簪
扣瑩篴和之婢乃歌云日暮風吹葉落依枝丹心寸意
愁君未知又云歌闌夜已久繁霜侵曉幕何意空相守
坐待繁霜落將旦別去以金簪遺文韶文韶亦贈以銀
盃及琉璃匕明日於清溪廟中得之乃知昨所見青溪
小姑也廣陵蔣子文嘗為秣陵尉擊賊傷而死吳孫權
時封中都侯立廟鍾山清溪小姑者蔣侯第三妹云

沈警字玄機吳興武康人也美風調善吟咏為梁東宮
常侍名著當時每公卿宴集必致騎邀之語曰玄機在
席顛倒賓客其推重如此後荆楚陷沒入周為上柱國
奉使秦隴途過張女郎廟旅行多以酒餽祈禱警獨酌
水具祝詞曰酌彼寒泉水紅芳掇岩谷雖致之非遙而
荐之隨俗丹誠在此神其感錄既暮宿傳舍憑軒望月
作鳳將雛含嬌曲其詞曰命嘯無人嘯含嬌何處嬌徘
徊花上月空度可憐宵又續為歌曰靡靡春風至微微

春露輕可惜關山月還成無用明吟畢聞簾外嘆賞之
聲復云閒宵豈虛擲明月豈無明音旨清婉頗異于常
忽見一女子褰簾而入拜云張女郎姊妹見使致意警
異之乃具衣冠未離坐而二女已入謂警曰跋涉山川
因勞動止警曰行役在途春宵多感聊因吟咏稍遣旅
愁豈意女郎猥降仙駕願知伯仲二女郎相顧而微笑
大女郎謂警曰妾是女郎妹適廬山夫人長男指小女
郎云適衡山府君小子並以生日同覲大姊屬大姊今

朝層城未旋山中幽寂良夜多懷輒欲奉屈無憚勞也
遂攜手出門共登一輜輶車駕六馬馳空而行俄至一
處朱樓飛閣備極煥麗令警止一水閣香氣自外入內
簾幌多金縷翠羽間以珠璣光照滿室須臾二女郎自
閣後冉冉而至揖警就坐又具酒肴於是大女郎彈箏
篴小女郎援琴為數弄皆非人世所聞警嗟賞良久願
請琴寫之小女郎笑而謂警曰此是秦繆公周靈王太子
神仙所製不可傳於人間警粗記數弄不復敢訪及酒

酣大女郎歌曰人神相合兮後會難邂逅相遇兮暫為

歡星漢移兮夜將闌心未極兮且盤桓小女郎歌曰洞

簫響兮風生流清夜闌兮管絃道長相思兮衡山曲心

斷絕兮秦隴頭又題曰隴上雲車不復居湘川斑竹淚

沾餘誰念衡山烟霧裡空看雁足不傳書警歌曰義熙

曾歷許多年張碩凡得幾時憐何意今人不及昔暫來

相見更無緣二女郎相顧流涕警亦下淚小女郎謂警

曰蘭香姨智瓊姊亦嘗懷此恨矣警見二女郎歌詠極

歡而未知密契所在警顧小女郎曰潤玉此人可念也
良久大女郎命履與小女郎同出及門謂小女郎曰潤
玉可使伴沈郎寢警欣喜如不自得遂攜手入門已見
小婢前施卧具小女郎執警手曰昔從二妃遊湘川見
君于舜帝廟讀湘東碑此時想念頗切不意今宵得諧
宿願警亦備記此事執手款叙不能自己小婢麗質前
致詞曰人神路隔別促會賒況姮娥妬人不肯留照纖
女無賴已復斜河寸陰幾時何勞煩瑣遂掩戶就寢備

極歡昵將曉小女郎起謂警曰人神事異無宜卜晝大
姊已在門首警於是抱持置于膝共叙衷款須臾大女
郎即復至前相對流涕不能自勝復置酒警又歌曰直
恁行人心不平卹宜萬里阻關情只今隴上分流水更
汎從來嗚咽聲警乃贈小女郎指環小女郎贈警金合
歡結歌曰結心纏萬縷結縷幾千迴結怨無窮極結心
終不開大女郎贈警瑤鏡子歌曰憶昔窺瑤鏡相望看
明月彼此俱照人莫令光彩滅贈荅極多不能備記粗

憶數首而已遂相與出門復駕輜輶車送至廟下乃執手嗚咽而別及至館懷中探得瑤鏡金縷結良久乃言於主人夜而失所在時同侶咸怪警夜有異香警後使回至廟中于神座後得一碧箋乃是小女郎與警書備叙離恨書末有篇云飛書報沈郎尋已到衡陽若存金石契風月兩相忘從此遂絕

異聞錄

會稽山陰賀瑀字彥琚曾得疾不知人惟心下尚溫居三日乃蘇云吏將上天見官府府君居處甚嚴使人將

瑤入曲房房中有層架其上有印及劍使瑤取之印雖意
所好短不及上層取劍以出問之子何得也瑤曰得劍
吏曰恨不得印可以驅策百神今得劍惟使社公耳疾
既愈每行即社公拜謁道下

錄異
傳

京兆董奇庭前有大樹陰暎甚佳後霖雨奇獨在家鄉
有小吏言大承雲府君來乃見承雲著通天冠長八尺
自稱為方伯某第三子有雋才方當與君周旋明日覺
樹下有異每晡後無人輒有一少年就奇語戲或命取

飲食如是半年奇氣強壯一門無疾奇後適下墅其僕客三人送護言樹材可用欲貨之郎常不聽今試共斬斫之奇遂許之神亦自爾絕矣

幽明錄

曇邕與弟子曇果澄思禪門嘗於一時果夢見山神求受五戒果曰家師在此可往諮受少時邕見一人著單衣恰風姿端雅從者二十許人請受五戒邕以果先夢知是山神乃為說法授戒神襯以外國七筋禮拜辭別倏忽不見至邕臨亡之日奔赴號踊

神僧傳

平原縣西十里舊有社林南燕太上時有邵敬伯者家
于長白山有人寄敬伯一函書言我吳江使也令吾通
問于齊伯吾今須過長白幸君為通之仍教敬伯但至
社林中取樹葉投之于水當有人出敬伯從之果見人
引入伯懼水其人令敬伯閉目似入水中豁然宮殿宏
麗見一翁年可八九十坐水精牀發函開書曰裕興超
滅侍衛者皆圓眼具甲冑敬伯辭出以刀子贈敬伯曰
好去但持此刀當無水厄矣敬伯出還至社林中而衣

裘初無沾濕其年宋武帝滅燕敬伯三年居兩河間夜中忽大水舉村俱沒唯敬伯坐一榻牀至曉著岼敬伯看之牀乃是一大黿也敬伯死刀子亦失世傳社林下

有河伯家

酉陽雜俎

河南陽起字聖卿少時疾瘡于社中得書一卷譴劾百鬼法為日南太守母至厠上見鬼頭長數尺以告聖卿聖卿曰此肅霜之神劾之來出變形如奴送書京師朝發暮返作使當千人之力有與忿恚者聖卿遣神夜往

趣其牀頭持兩手張目正赤吐舌柱地其人怖幾死

幽冥

錄

宋齊僧欽者江陵人也家門奉法年十許歲時善相占云年不過三六父母兄弟甚為憂懼僧欽亦增加勤敬齋戒精苦至年十七宋景平末得病危篤家齋祈彌厲亦淫祀求福疾終不愈時有一女巫云此郎福力猛盛魔魑所不能親自有善神護之然病久不差運命或將有限世有揆命術少事天神頗曉其數當為君試効之

於野中設酒脯之饋燒錢經七日七夕云始有感見見諸善神方為此郎祈禱蒙益兩算矣病必得愈無所憂也僧欽於是遂差彌加精至其後二十四年而終如巫所言則一算十二年矣

冥祥記

僧達返鄴京夜有神現身被黃服拜而跪曰弟子戴山胡也王及三谷正備供養願不須還達曰在山利少在京利多貧道觀機而動幸無遮止又經靜夜有推戶者稱曰山神之童曰日無暇今故叅拜并奉米糕一筐進

而重曰僧無偏為禮佛之時請蕙弟子名也

神僧傳

玄光見思大和尚後返錫江南屬本國舟艦附載離岸時綵雲亂目雅樂沸空絳節霓旌傳呼空中聲云天帝召海東玄光禪師光拱手避讓唯見青衣前導少選入宮城且非人間官府羽衛之設也無非鱗介參禰鬼神或曰今日天帝降龍王宮請師說親證法門吾曹水府蒙師利益既登寶殿次涉高臺如問而談畧經七日然後王躬送別其船汎洋不進光復登船船人謂經半日

而已上

宋文帝元嘉三年八月吳郡趙文昭字子業為東宮侍講宅在清溪橋北與吏部尚書王叔卿隔牆南北當秋夜對月臨溪唱烏棲之詞音旨閑怨忽有一女子衣青羅之衣絕美云王尚書小娘子欲來訪君文昭問其所以荅曰小娘子聞君歌詠有怨曠之心著清涼之恨故來願薦枕席言訖而至姿容絕世文昭迷悞恍惚盡忘他志乃揖而歸從容密室命酒陳筵遞相歌送然後就

寢至曉請去女解金纓留別文昭荅琉璃璫後數夜文
昭思之不已偶遊清溪神廟忽見所與琉璃蓋在神女
之後及顧其神與畫侍女並是同宿者

八朝窮
怪錄

餘杭縣南有上湖湖中央作塘有一人乘馬看戲將三
四人至岑村飲酒小醉暮還時炎熱因下馬入水中枕
石眠馬斷走歸從人悉追馬至暮不返眠覺日已向晡
不見人馬見一婦來年可十六七云女郎再拜日既向
暮此間大可畏君作何計問女郎姓何郎得忽相聞復

有一年少年十三四甚了了乘新車車後二十人至呼
上車云大人暫欲相見因迴車而去道中絡繹把火見
城郭邑居既入城進廳事有信幡題云河伯俄見一人
年三十許顏色如畫侍衛繁多相對欣然敕行酒炙云
僕有小女頗聰明欲以給君箕箒此人知神不敢拒逆
便敕備辦令就進婚郎中承白已辦遂穿絲布單衣紗
及袷裙紗衫襪履屐皆精好又給十小吏青衣數十
人婦年可十八九姿容婉媚便成三日經大會客拜閤

四日云禮既有限當發遣去婦以金甌麝香囊為婿別
涕泣而分又與錢十萬藥方三卷云可以施功布德復
云十年當相迎此人歸家遂不肯別婚辭親出家作道
人所得三卷方一卷脈經一卷湯方一卷丸方周行救
療皆致神驗後母老兄喪因還婚宦

幽明錄

宋劉子卿徐州人也居廬山虎溪少好學篤志無倦常
慕幽閒以為養性恒愛花種樹其江南花木溪庭無不
植者文帝元嘉三年春臨翫之際忽見雙蝶五彩分明

來遊花上其大如燕一日中或三四往復子卿亦訝其
大九旬有三日月朗風清歌噙之際忽聞扣扃有女子
語咲之音子卿異之謂左右曰我居此溪五歲人尚無
能知何有女子而詣我乎此必有異乃出戶見二女各
十六七衣服霞煥容止甚都謂子卿曰君常怪花間之
物感君之愛故來相詣未度君子心若何子卿延之坐
謂二女曰居止僻陋無酒叙情有慚于此一女曰此來
之意豈求酒耶況山月已斜夜將垂曉君子豈有意乎

子卿曰鄙夫唯有茅齋願申繾綣二女東向坐者笑謂
西向坐者曰今宵讓姊餘夜可知因起送子卿之室入
謂子卿曰郎閉戶雙棲同衾共枕來夜之歡願同今夕
及曉女乃請去子卿曰幸遂繾綣復更來乎一夕之歡
反生深恨女撫子卿背曰且女妹之期後即次我將出
戶女曰心存意在特望不憂出戶不知蹤跡是夕二女
又至宴如前姊謂妹曰我且去矣昨夜之歡今留與汝
汝勿貪多娛少感劉郎言訖大咲乘風而去于是同寢

卿問女曰我知卿二人非人間之有願知之女曰但得佳妻何勞執問乃撫子卿曰郎但申情愛莫問閑事臨曉將去謂卿曰我姊實非人間之人亦非山精物魅若說與郎郎必異傳故不欲取笑于人代今者與郎契合亦是因緣慎跡藏心無使人曉即姊妹每旬更至以慰郎心乃去常十日一至如是數年會寢後子卿遇亂歸鄉二女遂絕廬山有康王廟去所居二十里餘子卿一日訪之見廟中泥塑二女神并壁間畫二侍者容貌依

稀有如前遇疑此是也

八朝窮
怪錄

蕭總字彥先自建業歸江陵值宋廢帝元徽中四方多
亂因游明月峽愛其風景遂盤桓累歲常於峽下枕石
漱流時春向晚忽聞林下有人呼蕭卿者數聲驚顧去
坐石四十餘步有一女把花招總總心異之又常知此
有神女從之視其容貌當可并年所衣之服非世所有
所佩之香非世所聞謂總曰蕭郎遇此未曾見邀今幸
良辰有同宿契總恍然行十餘里乃見溪上有宮闕臺

殿甚嚴宮門左右有侍女二十人皆十四五並神仙之質其寢卧服玩之物俱非世有心亦喜幸一夕綢繆以至天曉忽聞山鳥晨叫巖泉韻清出戶臨軒將窺舊路見烟雲正重殘月在西神女執總手謂曰人間之人神中之女此夕歡會萬年一時也總曰神中之女豈人間所常望也女曰妾實此山之神上帝三百年一易不似人間之官來歲方終一易之後遂生他處今與郎契合亦有因由不可陳也言訖乃別神女手執一玉指環謂

曰此妾嘗服玩未曾離手今永別寧不相遺願郎穿指
慎勿忘心總曰幸見顧錄感恨徒深執此懷中終身是
寶天漸明總乃拜辭掩涕而別攜手出戶已見路分明
總下數步迴顧宿處宛見巫山神女之祠也他日持玉
環至建業因話於張景山景山驚曰吾嘗遊巫峽見神
女指上有此玉環世人相傳云是晉簡文帝李后曾夢
遊巫峽見神女神女乞后玉環覺後乃告帝帝遣使賜
神女吾親見在神女指上今又令卿得之是世世異人

矣總齊太祖建元末方徵召未行帝崩世祖即位累為
中書舍人初總為制書御史江陵舟中偶而忽思神女
事悄然不樂乃賦詩曰昔年巖下客宛似成今古徒思
明月人願濕巫山雨

廣記

義鄉縣長風廟神姓鄧先經為縣令死遂發靈周山圖
啟乞加神位輔國將軍上答曰足狗肉便了事何用階

級為

南齊書

陳霸先討侯景進次大雷軍人杜稜夢雷池君周何神

自稱征討大將軍乘朱航陳甲仗稱下征侯景須臾便

還云已殺景死

陳書

孝武初裴粲出為膠州刺史屬時亢旱土人勸令禱於海神粲憚違衆人乃為祈請直據胡牀舉杯曰僕白君左右云前後例皆拜謂粲曰五嶽視三公四瀆視諸侯

安有方伯致禮海神卒不肯拜

北史

劉晝夜嘗夢貴人若吏部尚書者補交州興俊令寤而密書記之卒後旬餘其家幼女鬼語聲似晝云我被用

為興俊縣令得假暫來辭別云上

蕭猷封臨汝侯為吳興郡守性倜儻與楚王廟神交飲至一斛每酌祀盡歡極醉神亦有酒色祈禱必從後為益州刺史時江陽人濟苟兒反猷乃禱之請救是日有田老逢一騎從東方來問去城幾里曰百四十時日已晡騎舉稍曰後人來可令之病馬歛又曰破賊俄有數百騎如風一騎過請飲田老問為誰曰吳興楚王來救臨汝當此時廟中請祈驗十餘日乃見侍衛土偶皆泥

濕如汗者是日猷大破苟兒

梁書

初聖武皇帝嘗率數萬騎田於山澤歛見輜車自天而下既至見美人侍衛甚盛帝異而問之對曰我天帝女受命相遇隨同寢宿且請還曰明年周時復會此言終而別去如風雨及周歲前所田處果復相見此女以所生男授帝曰此君之子也善養視之子孫相承當世為帝語訖而去子即世祖也

後魏書

吳興徐長夙與鮑南海有神明之交欲授以秘術先謂


徐宜有約誓徐誓以不仕於是受錄常見八大人在側
能知來見往才識日異縣鄉翕然有美談欲用為縣主
簿徐心悅之八神一朝不見七神餘一神倨傲不如常
徐問其故答云君違誓不復相為使身一人留衛錄耳
徐乃還錄遂退

世語

北齊盧元明聘于梁其妻乘車送至河濱忽聞水有香
氣異常顧見水神湧出波中牛乃驚奔曳車入河其妻

溺死

北史



廣博物志卷十四